

Enkontru Grupu Servisu Jéneru Nasionál

Delta Nova, Díli, 7 Fevereiru 2012

Bom dia no benvindu bá membru foun ne'ebé hetan numeasaun nudar grupu servisu jéneru

Exma. Sra. Rita Reddy, Asesora Seniór Jéneru UNMIT

Exma. Sra. Min-Whee, Country Representative

Exma. Sra. Caroline Meenagh, Koordenadóora Asuntu Violénsia bazéia bá Jéneru (UNFPA),

Benvindu bá representante husi Irish Aid,

Benvindu bá funsionáriu SEPI tomak ne'ebé marka prezensa iha fatin ida ne'e.

Workshop ida ne'e sai nudar primeiru oportunidade bá **Grupu Servisu Jéneru** ne'ebé foin estabelese hodi mai hamutuk no ami kontente tebes hodi hamutuk ho ita bo'ot sira iha loron ohin ne'ebé kompostu husi Grupu Servisu Jéneru 17 ne'ebé inklui diretór jéral sira hanesan lider bá grupu servisu no diretór sira hamutuk ho tékniku sira husi Ministériu no Sekretáriu Estadu sira hotu.

Objetívu husi Enkontru ida ne'e mak;

1. Deskute kona-baObjetívu, papel no responsabilidade bá Grupu Servisu Jéneru foun.
2. Identifika área ne'ebé presiza assisténsia no treinamentu.
3. Fó énfaze bá mekanizmu ne'ebé SEPI bele ajuda teknikamente no treinamentu ne'ebé bele fó suporta bá servisu Grupu Servisu Jéneru.

Ami mós hein katak liu husi enkontru ida ne'e sei fasilita membru **Grupu Servisu Jéneru** foun sira ho ezemplu pratika kona-ba oinsa atu implementa atividade abordajen integrada jéneru ne'ebé konkretu iha servisu no planu sira mai husi Ministériu relevante oinsa polítika/programa sira sensitívu bá jéneru, iha planu no orsamentu sira ne'ebé dezenvolve ona.

Ami mós iha esperansa katak workshop hanesan ne'e bele nafatin akontese iha futuru bele kontinua eziste liu husi liña Ministériu no bele oferese oportunidade hodi fahe informasaun no koñesimentu entre Grupu Servisu Jéneru sira.

Hanesan ita bo'ot sira hotu hatene ona, kuaze tinan tolu ona mak hala'o implementasaun

mekanizmu Pontu Fokal Jéneru.

Iha fulan Setembru 2011 Konsellu Ministru adopta Rezolusaun No. 27/2011 ne'ebé halo revizaun bá iha mekanizmu Pontu Fokal Jéneru liu-liu atu estabelese koordenasaun bá abordagem integrada jéneru ida ne'ebé sai efetivu no efesiente liu-tan. Rekomendasaun hodi halo revizaun bá iha mekanizmu refere bazéia bá prosesu konsultasaun ne'ebé alargada ho autór xave, inklui Pontu Fokal Jéneru antigu sira ne'ebé mosu ho sujestaun kona-ba nesesidade hodi kria mekanizmu foun ne'ebé envolve ofisiál governu nian ne'ebé iha influencia direta kona-ba desenvolvimentu no implementasaun politika, planu no orsamentu.

Atu responde bá rekomendasaun sira ne'ebé mensiona iha leten, agora dadaun esplika klaru ona iha rezolusaun foun katak Grupu Servisu Jéneru Nasionál sei estabelese iha kada Ministériu no Sekretáriu Estadu nia okos no ida ne'ebé sei lidera Grupu Servisu Jéneru mak nível diretór jéral no minimu membru husi Grupu Servisu Jéneru ida ne'e husi nível diretór planeamentu, polítika, finansa no monitorizasaun no avaliasaun.

Bá nível distritu Grupu Servisu Jéneru, sei lidera husi Vise Administradór no membru mak inklui komandante VPU distritu no diretór distritu husi Ministériu Solidaridade Sosiál, Edukasaun, Saúde, Justísa, Agrikultura no Infraestrutura.

Rezolusaun ida ne'e mós foka bá establishesimentu kona-ba Grupu Servisu Interministeriál no Grupu Servisu Distritu no sei koordena husi SEPI liu-liu oinsa atu fó suporta bá iha desenvolvimentu parseiru iha iniciativa no implementasaun estratéjia abordajen integrada jéneru sira.

Espera katak mekanizmu foun ida ne'e sei halo koordenasaun ne'ebé efetivu no fasil hodi halo monitorizasaun no bele hadia promosaun bá iha abordajem integrada jéneru.

Bazéia bá rezolusaun, SEPI iha papel importante hodi suporta Grupu Servisu Jéneru foun ne'e eziste ona. Atu responde bá nesesidade ida ne'e, SEPI desenvolve ona estratéjia preliminaría ida, liu-liu atu suporta servisu husi Grupu Servisu ninian no alokasaun orsamentu ne'ebé mai husi IrishAid hodi ajuda atu fasilita koordenasaun no treinamentu bá membru Grupu Servisu Jéneru iha nível nasional no distritu. Estratéjia ida ne'e inklui iha aprosimasaun no oráriu enkontru trimestral Grupu Servisu Jéneru Interministeriál no Interdistritál nune'e mós desenvolvimentu treinamentu sira, rekursus no meu hodi suporta esforsu abordajem integrada jéneru husi **Grupu Servisu Jéneru**. Parte husi suporta SEPI nian

kanaliza liu husi forma Projetu Orsamentu Sensível bá Jéneru ne'ebé implementa ho parsería ho UN WOMEN no sistéma ida ne'e sei esplika husi Diretór Armando iha sesaun tuir mai.

Hein katak workshop ida ne'e sei ajuda ita bo'ot sira hotu hodi aumenta koñesimentu no komprensaun kona-ba oinsa ita bo'ot sira nia Grupu Servisu Jéneru bele konkretamente hahú hodi fó suporta bá iha abordagem integrada do jéneru iha politika, planu no orsamentu iha Ministériu no Sekretáriu Estadu relevante.

SEPI sei nafatin disponível atu fasilita, assisténsia tékniku no treinamentu hodi suporta esforsu Grupu Servisu Jéneru. Nune'e mós ami nafatin hein ita bo'ot sira nia kooperasaun no kolaborasaun asuntu ida ne'e.

Hau nia deseju bá ita bo'ot sira iha workshop ne'ebé produtivu no susesu bá iha servisu Grupu Servisu Jéneru ninian.

Obrigada.